



Kelly Berthelsen
Inatsisartunut ilaasortaq, Inuit Ataqatigiit

§ 37 nr. 2017_249 Kulturikkut ilisarnaatit

27-11-2017
Suliaq nr. 2017 - 25975
Allakkat nr. 6658031

Asasara Kelly Berthelsen,

Inatsisartut suleriaasiat naapertorlugu kulturikkut ilisarnaatit pillugit apeqqutigisannut qujanaq. Apeqqutigineqartut ataani akissuteqarfigissavakka.

Postboks 1029
3900 Nuuk
Oqarasuaat: +299 34 50 00
Fax.: +299 32 20 73
Email: ikiin@nanoq.gl
www.nanoq.gl

Apeqqut 1:

Inuiaqatigiit kalaallit kulturikkut ilisarnaatinik, kikkut tamarmik ilisimasariaqagaannik (kulturkanon) aalajangersakkanik sunik peqarpat?

Akissut:

Danmarkimi Kultureqarnermut ministerip 2004-mi aallarnigaatut ittumik Kalaallit Nunaanni kulturikkut aalajangersakkanik ilisarnaateqanngilaq.

Piffissalli ingerlanerani kulturikkut ingerlatsiviit assigiinngitsut - soorlu Nunatta Katersugaasivia, najukkani katersugaasiviit, Nunatta Atuagaateqarfia, Nunatta Isiginnaartitsisarfia, Kulturikkut illorsuit Katuaq aamma Taseralik il.il. - pilersinneqarsimapput. Taakku saniatigut eqqumiitsulioriaatsit assigiinngitsut iluini eqqumiitsuliornikkut kulturikkullu peqatigiiffeqarpoq: atuakkiorneq, isiginnaartitsineq, filmiliorneq, qilaatersorneq il.il., tamakkulu tamarmik kalaallit eqqumiitsuliornikkut kulturikkullu oqaluttuassartaat pillugit ilisimasaqarfiupput.

Suliffeqarfiit inatsisitigut pisussaaffilerneqartut kalaallit kulturiannik ataatsimut siuarsaanissamik pisussaaffeqarput, malittarisassallu malillugit taakku sulinissaannut aningaasanut inatsit aqqtigalugu aningaasanik immikkoortitsiffigineqarsimapput.

Apeqqutit 2:

Ilisarnaatinik peqarsimanngikkutta, kikkunnit qanorlu aalajangerneqassappat?

Akissut:

Naalakkersuisut isumaqarput soqutigisaqaqatigiit piukkunnartut akuutinneqarnissaat pissusissamisuussasoq, taamaasiornikkut kalaallit kulturikkut ilisarnaataat (kulturkanon) paaseqqissaarneqarsinnaassammata, tamassuma suliakkiutigineqarnissaa kissaatigineqassappat. Soqutigisaqaqatigiit piukkunnartut Naalakkersuisut isumaat naapertorlugu tassaasinnaapput eqqumiitsuliornikkut kulturilu eqqarsaatigalugu peqatigiiffiit aammalu ingerlatsiviit kulturikkut ingerlataqartartut allat.

Tassunga tunngatillugu apeqqutit tassaasinnaapput kulturkanonip atuuffissaa, kikkunnut saaffiginnittuussava kiisalu Kalaallit Nunaanni kulturkanon sunik

tunngavissaqartinneqarluni ingerlatinneqassava. Tamatuma saniatigut kulturkanonip pitsaaqutai ajoqutaalu misissoqqissaarnissai pisariaqassaaq. Tamatuma saniatigut siunertamut tassunga aningaasanik illikartitsinissaq pisariaqartussaassaaq.

Eqqumiitsuliornermut piorsarsimassutsimullu periusissionerup nanginneqarnissaanik Naalakkersuisut peqquneqarnissaanik Inatsisartut aalajangiiffigisassaattut siunnersuut, tassunga ilanngullugu inatsisit atuuttut nalilersuiffigineqarnissaat suliniutissallu allat Inatsisartut UKA2017/114 ataatsimiinneranni akuersissutigineqarpoq. Periusissiaq UKA2018 nallertinnagu Inatsisartunut ilaasortanut agguanneqartussaavoq.

Naalakkersuisunit pissusissamisoorsorineqarpoq kulturkanonimik pilersitsisinnaanermut atatillugu suliat siuliani pineqartut ilanngunneqarnissaat.

Med venlig hilsen
Inussiarnersumik inuulluaqqusillunga


Doris J. Jensen